

# PM tiba di Jakarta untuk lawatan rasmi

**Jakarta:** Perdana Menteri, Tan Sri Muhyiddin Yassin dan isteri, Puan Sri Noorainee Abdul Rahman tiba di Lapangan Terbang Antarabangsa Halim Perdanakusuma, di sini semalam untuk lawatan rasmi dua hari ke Indonesia.

Ketibaan Muhyiddin dan Noorainee pada jam 4.30 petang (waktu tempatan) disambut Menteri Dalam Negeri Indonesia, Tito Karnavian; Menteri Luar Malaysia, Datuk Seri Hisyamuddin Hussein dan Duta Besar Malaysia ke Indonesia, Datuk Zainal Abidin Bakar.

Ini lawatan dua hala pertama Muhyiddin ke negara Asia Tenggara sejak menjawat jawatan Perdana Menteri pada Mac tahun lalu. Beliau dijangka mengadakan perjumpaan de-

ngan Presiden Indonesia, Joko Widodo (Jokowi), diikuti Majlis Jamuan Makan Tengah Hari dihoskan Jokowi, hari ini.

Delegasi itu akan mematuhi protokol kesihatan yang ketat, termasuk menjalani ujian saringan sebelum pelepasan, sebaik ketibaan, selain menjalani tempoh kuarantin sebaik kembali ke Malaysia, esok.

Dalam menyedari kepentingan hubungan dua hala Malaysia-Indonesia dan cabaran pandemik COVID-19, Perdana Menteri sendiri meminta lawatan itu disingkatkan dan jumlah anggota delegasi yang kecil.

Hari ini, Perdana Menteri akan diberikan sambutan negara di Istana Merdeka di sini dan kemudian kedua-dua pemimpin akan mengadakan per-

bincangan empat mata sebelum mengadakan persidangan media bersama.

Lawatan ini akan menyediakan platform bagi kedua-dua pemimpin mengukuhkan lagi hubungan dua hala dan kerjasama kedua-dua negara.

Ia juga akan membolehkan Malaysia mengetengahkan dasar terbaru kerajaan dan pendiriannya, terutama berhubung isu yang memberi manfaat bersama.

Antara isu dijangka dibincangkan adalah berkaitan diskriminasi minyak sawit, jerebu, potensi pelaburan dan perdagangan usaha sama, pelaksanaan Laluan Hijau Timbal Balik (RGL) serta kerjasama dalam menangani COVID-19.

BERNAMA



*Muhyiddin tiba di Jakarta untuk lawatan rasmi dua hari ke Indonesia, semalam.*

(Foto BERNAMA)